

MODIFICACIONES NO PLANO DE SOGAMA DE XESTIÓN DO LIXO

M.S.

Afinais de xaneiro constituiu-se a Comisión do Consello Galego do Meio Ambiente coa finalidade de analizar e emitir un ditame sobre os aspectos ambientais do Plano de Xestión de Resíduos Sólidos Urbanos da Xunta. Trata-se da última versión do Proxecto aprobado polo Consello da Xunta en xaneiro de 1992, hai nada menos que 5 anos.

O documento que se somete a valoración consta dunha Memoria xustificativa, a modo de resumo, e de trés tomos: i) Programa de Valorización, ii) Programa de Eliminación Final e iii) Estudo de Efeitos Ambientais. No momento de escrever estas liñas, ADEGA, que está representada na referida Comisión desde a que tivo acceso á documentación, está a realizar unha valoración en detalle do plano, polo que aquí só apontaremos algúns aspectos parciais do mesmo.

En relación ao proxecto de 1992, hai algunas variacións de importancia, ainda que o enfoque segue a ser o de incineración como única forma de transformación e/ou eliminación do lixo. O tomo 2 fala, porén, de recollida selectiva, para o cal se prevé unha dotação en colectores de papel, vidro e plásticos, nun número que non supera

en moito a cantidade de que se dispón hoxe para papel e para vidro en muitas localidades. O número de colectores é incluso inferior ao hoxe existente nalgúns casos, prevendo-se en xeral unha dotación de 1 ou 2 colectores por concello. As cifras globais para todo o país son as seguintes: colectores de vidro, 518; colectores de papel, 850; colectores de plástico: 1275.

Esta modificación do plano veu forzada non só polas campañas de concienciación realizadas na Galiza, senón tamén pola adopción no estado español de normativa como a Lei de Envases e Resíduos de Envases, que obriga a unha reciclaxe mínima do 25% destes, ainda que dudamos que o actual plano da Xunta poida acadar esta cifra, de por sí reducida.

Por outro lado, a oposición veciñal ás diferentes instalacións do plano, foi levando á sua reordenación progresiva, que conduciu finalmente a unha única planta de elaboración de combustíbel (antes contemplavanse catro, unha por provincia) a situar en Cerceda, a onde se ha de transportar todo o lixo. A capacidade da incineración tamén sofreu unha merma, falando-se agora de só 475.000 Tm/ano, algo menos do 60% do lixo total.

Podería pensarse que esta redución ten que ver coa consideración da recollida selectiva, pero a análise do plano mostra-nos que alí onde consiga implantarse conta-se coa totalidade do lixo con destino á incineración. Isto mesmo se desprende claramente do borrador de convénios que SOGAMA propón aos concellos, segundo o cal estes serán penalizados no caso de que as cantidades de lixo a entregar se visen reducidas en mais dun 5%. A reducción da capacidade da incineradora ten mais que ver co alto custe desta alternativa, especialmente para os concellos pequenos e afastados, e coa constatación de que muitos concellos preferirían cunha calquera outra alternativa, sen desbotar que se continue co vertido incontrolado, sempre permitido polas autoridades da Xunta.

Claramente, o plano de SOGAMA non vai acabar cos numerosos vertedeiros incontrolados. No próprio documento indican-se 8 áreas preferenciais para a instalación de empacadoras, que coinciden co eixo Ferrol-Coruña-Santiago-Pontevedra-Vigo. O resto dos concellos non se lles ofrece nengunha solución adecuada ás suas necesidades, ao tempo que se segue a descriminar calquera outra alternativa racional de xestión do lixo que non pase pola incineración.

Ante as trabas ao debate no seo do Consello Galego do Meio Ambiente (que se limitará a unha Comisión reducida e pechada, poñendo incluso trabas á distribución da documentación) e o feito de que muitas organizacións e sectores sociais non están presentes no mesmo, ADEGA ten previsto convocar unha reunión aberta onde se poda coñecer con detalle o alcance do plano. Por outro lado, calquera persoa interesada poderá contactar con ADEGA para recabar máis información.



FOTO: Manolo Soto

Vista do vertedero municipal de Teo

Contacto

ADEGA: Rua de Touro 21-2º; 15704-Santiago. Tel. 981-570099